


AWIG-AWIG DESA ADAT
TINGKAD BATU



KAMEDALANG OLIN
KERAMA DESA ADAT TINGKAD BATU
DESA JEHEM KEC. TEMBUKU
KABUPATEN BANGLI
≈ 1992 ≈

AWIG~AWIG DESA ADAT TINGKADBATU



kamedalang oleh
kerama desa adat tingkadbatu
DESA JEHEM KEC. TEMBUKU
KABUPATEN BANGLI
~ 19 92 ~

MURDHA CITTHA

KACA

SARGAH	I	Aran Lan Wewidangan	1
SARGAH	II	Petitits Lan Pamikukuh	1
SARGAH	III	Sukerta Tata Pakraman	1
		Palet 1 Indik Krama	1
		Palet 2 Indik Dulu/Prajuru Desa	4
		Palet 3 Indik Paruman	5
		Palet 4 Indik Kulkul	6
		Palet 5 Indik Druwen Desa	7
		Palet 6 Sukerta Pamitetep	8
		Kaping 1 Karang, Tegal lan Carik ..	8
		Kaping 2 Pepayonan	9
		Kaping 3 Wawangunan	9
		Kaping 4 Wawalungan	9
		Kaping 5 Bhaya	10
		Kaping 6 Penyanggran Banjar	11
		Kaping 7 Pariwertl (Kelestarian Lingkungan)	11
SARGAH	IV	Sukerta Tata Agama	11
		Palet 1 Indik Dewa Yadnya	11
		Palet 2 Indik Resi Yadnya	14
		Palet 3 Indik Pitra Yadnya	14
		Palet 4 Indik Manusa Yadnya	18
		Palet 5 Indik Bhuta Yadnya	18
SARGAH	V	Sukerta Tata Pawongan	19
		Palet 1 Indik Pawiwahan	19
		Palet 2 Indik Nyapian	21
		Palet 3 Indik Sentana	22
		Palet 4 Indik Warisan	23
SARGAH	VI	Wicara Lan Pamidanda	25
		Palet 1 Indik Wicara	25
		Palet 2 Indik Pamidanda	26
SARGAH	VII	Nguwah - Nguwuhin Awig - Awig	27
SARGAH	VIII	Pamuput	27

OM AWIGHNAM ASTU NAMO SHIDHAM

Malarapan antuk panugrahan Ida Sang Hyang Widhi Wasa, sami Krama Adat Tingkadbatu, Desa Jehem, Kecamatan Tembuku, Kabupaten Daerah Tingkat II Bangli, prasida mutusang Pasaban, duk rahina, Buda Wage Wuku Langkir, titi, pangelong ping 11, Sasih Kapitu, tahun Icaka : 1913, tanggal Masehi, 1 Januari 1992, mutusang gumawe Awig-Awig Desa Adat Pakraman, pinaka sepat siku-siku, pameneh, wastu mangda prasida ngamolihang Kasukertan kahuripan Krama Adat sakadi linging Awig-Awig puniki :

SARGAH I

Pawos 1

1. Desa Adat puniki mawasta Desa Adat Tingkadbatu.
2. Jebag kakuwub wawidangan sane mawates nyatur :
 - a. Sisi Wetan utawi Kangin : Desa Adat Tibubolong.
 - b. Sisi Kidul utawi Kelod : Tukad Campuhan.
 - c. Sisi Kulon utawi Kauh : Desa Adat Jehem.
 - d. Sisi Lor utawi Kaja : Desa Adat Sama.

SARGAH II

Pawos 2

Patitis lan Pamikukuh :

Desa Adat Tingkadbatu ngemanggehang pamikukuh :

1. Pancasila.
2. Undang-Undang Dasar 1945, pamekas pasal 18, taler UU No. 5 th 1974, U U No. 5 th. 1979.
3. Tri Hita Karana, manut Sadacara Agama Hindu.

Pawos 3

Luir patitis Desa Adat Tingkadbatu :

1. Mikukuh miwah ngerajegang Agama Hindu.
2. Mikukuh Awig-Awig, sima, kasukertan pawongan sakala lawan niskala.

SARGAH III

Sukerta Tata Pakraman

Palet 1.

Indik Krama.

Pawos 4.

1. Sane kabawos Krama Desa Adat Tingkadbatu inggih punika Ida Dane Kulawarga Lanang-Istri sane nganutin Agama Hindu saha ngemong Karang Desa miwah nyungkeming Kahyangan Tiga Desa Adat Tingkadbatu.
2. Sejaba punika sinanggeh tamu.

Pawos 5.

Warga Desa Adat wenten 4 (petang) pawos luire :

1. Pengayah marep/ngarep Lanang-Istri, utawi rawuh Kulawarga sami/Nyada.
2. Bala Angkep.
3. Teruna-teruni utawi alit-alit sami.
4. Sejaba punika sinanggeh tamiu.

Pawos 6.

Kawit dados Krama Adat utawi Banjar Adat :

1. Sangkaning ngemong karang Desa Adat utawi Pecatu.
2. Sampun jenek ngerama Desa Adat awarna ngemungguhahang.
3. Sane nyepih Karang Desa utawi Karang Kerti.
4. Sainut ring Awig-Awig pasuara lan pararem.

Pawos 7.

Panemayan tedun dados Desa Adat utawi Banjar Adat.

1. Malarapan antuk pawiwahan warga desa, masangke manut pararem.
2. Malarapan ngrereh karya saha magenah, mapaumahan ring palemahan Desa Adat Tingkadbatu risampun negepin kadi ring sor :
 - a. Wenten atur utawi pasadok ring prajuru Adat, mungguwing pamargine sareng makrama antuk ilikita pastika sakeng Ikrama Adat pecak.
 - b. Tinut satuut ring Awig-Awig Desa Adat Tingkadbatu.
 - c. Saha sane lianan manut pararem lan deresta.

Pawos 8

Sahanan Krama Desa sami keni tategenan utawi ayah-ayahan luire :

1. Patut satinut ring daging Awig-Awig sane masurat utawi pasuara, sima kerti, miwah seanan perarem Desa Adat.
2. Krama Desa Adat keni ayahan miwah papeson sajangkepnyane.
3. Sane lianan manut pararem lan dresta.

Pawos 9.

Swadarmaning warga sewosan ring ayah-ayahan luire :

1. Krama Desa Adat, Krama Desa lan Roban :
 - a. Tan maren utawi tan surud-surud ngutsahayang mangden desane prasida nyujur anut patitis.
 - b. Patut masadok ring prajuru Adat utawi prajuru Dines prade wenten :
 - madruwe oka wawu embas, deha truna kajangkepan, manawita kelilayang utawi kelangan, kapadik utawi ngerorod, masengker aselid.
 - Ngajak wong dadudukan masundulang raga.
 - Lelawasan nyami mulih kadeha/teruna.
 - Nampi tamiu nyantos nginep/makolem, miwah sane lianan manut deresta.

2. Tamiu patut :

- a. Tinut ring tatiwak Desane ngupadi kasukertan.
- b. Tan wenten tungkas ring pamargin Desane.
- c. Wenang nganutin mekrama Bala Angkep utawi suka-duka.

Pawos 10.

Swadarma Desa sewosan'i sane kadadosang :

1. Mapoangkid utawi tan tedun

- a. Rikala mapewangunan, ngeraabin, mayadnya, nandur/
mamulih, maduwe kulawarga sungkan/nunas tamba lan
siosan punika manut deresta.
- b. Kengin indik tempo wantah apisan, sejawaning wenten
putusan Prajuru/dulu-dulu.

2. Nyada utawi mademang ayah, risampun mayusa 50-70 warsa.

3. Nyuksukin nyeledinin ayah sane nyada risampun nyidayang
nganutin krama utawi munggah deha teruna.

4. Nutug ayah antuk arta berana manut paitungan soang-soang
krama, manawi malarapan cuntaka, malaluasan 3-7 rahina.

5. Luput bacakannyane : luput manuk, luput ayah, luput arta
brana, luput sakwitutawi akenjang, turmaning sane
kapatutang inggih punika :

- a. Sang sakit tahunan/tibanan.
- b. Sang ceda angga banget.
- c. Sang kawelas asih, minakadinnyane anak-alit ubuh.
- d. Muah sane lianan, manut dresta lan pararem.

Pawos 11.

Mungwin wusan dados Krama Desa luire :

1. Sangkaning :

- a. Pinunas ngeraga, menawi kesah kedura Desa utawi
kedura Pulo.
- b. Kenorayang, duaning sampun tan prasida ngesehin
solah maprawerti setata nguwig kecaping Awig-Awig,
deresta, peswara.
- c. Ninggal utawi nilar Agama Hindu.

2. Sang Wusan mekrama patut :

- a. Ngaturang karang ayah utawi ayahan desa.
- b. Tan polih pah-pahan sangkaning padrueyan Desa
sajabaning pah-pahan padrueyan kaguna-kayan manut
putusan pararem.

3. Sang nanggap karang kerti dados kecabut mewali ke Desa
Adat riantukan :

- a. Tan wenten ngayahang wiadin naur urunan sekadi
patut manut pararem.
- b. Tan wenten panyeledii utawi sang nanggap camput.
- c. Sang nanggap murug kertaning Desa Adat, manut
Awig-Awig kasurat utawi pararem.

- d. Sang naggap ninggal swadarma lan tategenan Desa Adat, ninggal Agama Hindu.
- e. Karang Kerti sane katanggap olih krama adat make tanah tatakan ayah ngempunin utawi ngertian sukertan desa pekraman lan kayangannyane.
- f. Sang naggap ngadol karang ayah kerti tan polih kapastikan Dulu Adat utawi Krama Adat.

Palet 2.

Indik Prajurun /Dulun Desa

Pawos 12.

- 1. Desa Adat Tingkadbatu kaenter antuk Bendesa Adat utawi Kelian Adat.
- 2. Bendesa Adat utawi kelian Adat patut :
 - a. Mawiwit sakeng krama ngarep.
 - b. Keadegang melarapan antuk pasuara utawi pamilihan olih paruman krama desa regep utawi 3/4 krama satinut.
 - c. Bendesa Adat/Kelian Adat kawantu olih Penyarikan, pecatu/petengen, petajuh, utawi pangliman Adat.
 - d. Ngemanggehang Prajuru Adat maduluran Dewa Saksi ring Pura manut kawentenan.

Pawos 13.

- 1. Gegambelan Prajuru Adat :
 - a. Bendesa Adat pinaka pamucuk ngambel Adat.
 - b. Petajuh utawi Pangliman pinaka Wakil Bendesa Adat
 - c. Panyarikan pinaka juru surat
 - d. Pecatu utawi patengen pinaka pangemong druwen Desa
 - e. Pangliman / Kesinoman pinaka juru arah.
- 2. Kasinoman akeh nia manut kawigunan saha magilir nyabran sasih.
- 3. Sajeroning ngenterang kasukertan niskala Bendesa mingsing-gihang Pemangku Kahyangan Desa.

Pawos 14.

- 1. Swadharmaning Bendesa Adat luire :
 - a. Ngenterang pemargin Awig-Awig miwah pararem Desa.
 - b. Nuntun tur ngenterang krama rawuhing warga Desa Ngupadi antuk patitis.
 - c. Mawosang kalih niwakang pemutus arep ring wicara Warga Desa.
 - d. Maka Duta Desa matemuang bawos ring sapesire ugi.
- 2. Prade Dulu-dulu iwang pengelaksana keni pamidanda nikel ring kaiwangan soang-soang krama, saha kangkat kekaryanang manut pararem.

Pawos 15.

Petias utawi olih-olihan prajuru / Dulun Desa, luire :

- a. Luput rerampen / papeson
- b. Polih tanding tengah
- c. Upon pecatu / pelaba carik / tegal
- d. Miwah petias sewosan manut deresta lan pararem.

Pawos 16.

1. Prajuru utawi Prajurun Desa kagentosin riantukan :

- a. Seda
- b. Pinunaanyane
- c. Kanorayang duaning iwang pemargi menawi nilar sesana
- d. Pastika pangadegan / perundang-undangan.

2. Prajuru kanorayang mejalaran antuk pararem maka pamutusing papareman banjar

3. Akeh Prajuru ring Adat patutnyane apacekan/kekalih.

Palet 3.

Indik Paruman

Pawos 17.

1. Bacakan paruman luire :

1.1. a. Paruman Desa Adat kaenter antuk Prajuru Adat.

b. Paruman prajuru manut kawigunan.

c. Paruman krama Kahyangan Tiga kaenter olih prajuru Kahyangan.

d. Miwah paruman lianan kaenter antuk suang - suang prajuru.

1.2. Paruman inucap kawentenang :

a. Paruman Desa Adat ngangken ngesasih makecihna tanpa arah-arang duaning sampun tetap panemaya perarem.

b. Napkala/padgata kala majalaran arah-arang manut tetujon.

2. Paruman Desa utawi banjar/sekeha-sekeha madudonan sekadi ring sor :

a. Prasida kemargiang risampun karauhin antuk sang patut ngamiletin, kakawitin antuk tengeran kulkul, miwah mabusana nyalempot, saha tan kalugra makta gegawan senjata/sakaluire, yan tan wenten pawarah prajuru manut kawigunan tatedunan.

Tan maren ngarcana ring Ida Bhagawan Penyarikan maka sarana Widhi Widana.

b. Maka sarana janggi, pengawit kalaksanayangpenyacak sep-sep.

c. Tan kalugra ngawetuang suara gora utawi byota, yan wenten patut keni pamidanda pecamil kadi dandaning nguman-uman.

- d. Pemutus bebawos beriuk sepanggul (ingkup) punika kemanggehang.
3. Prade pidaging paruman tan kaigumin/kaingkupin mangda Prajuru/Dulun Desa ngilikang babawos, saha kaputusan mangda kararemin antuk Krama Desa bilih tan prasida kasungkemin jantos ping tiga, Prajuru Dulu wenang nunas bawos ring sang ngawe wenang.

Pawos 18.

1. Sajeroning paruman Desa, Bendesa Adat patut nyiarang pamargin ngenterang Desa, pamekas nganinin :
- a. Munjuk lungsuring pekraman saha ayah-ayahan, sulur arta brana, drue Desa.
 - b. Rencana Prajuru/Dulu nganinin usaha Desa kapungkur.
2. Pamutus paruman Desa sinanggeh pararem maka pitegep pemargin Awig-awig.

Pawos 19.

1. Sangkepan Prajuru/Dulun Desa kawenangang wantah ngarincikang pengerancana usaha Desa kapungkur.
2. Sangkepan Prajuru/Dulun Desa tan kawenangang ngawedalang tatogenan ring krama, sadereng kaingkupin antuk krama Desa.
3. Pamutus sangkepan Prajuru/Dulun Desa ngawetuang pasuara, maka pidaging pituduh sang ngawe Wenang utawi ngonekang pecak pararem krama Desa.

Palet 4.

Indik Kulkul

Pawos 20

1. Kulkul ring Desa Adat Tingkadbatu luire :
- a. Kulkul Desa Adat utawi Adat Dinas.
 - b. Kulkul sekeha Gong.
 - c. Kulkul sekeha-sekeha lianan.
2. Tabuh tepakan kulkul inucap pastika, masiosan manut tatujon luire :
- a. Telung tuludan lambat, tengeran tedun ngayah.
 - b. Atuludan bulus, tengeran bencana minakadi : Kebaak; Kaamuk, umah puun.
 - c. Tengeran sinalih tunggil warga desa/banjar seda : sia kelentungan alon.
 - d. Tengeran tigang kelentungan banban, maka cihna patedunan tan kemargiang.
 - e. Tengeran atuludan bulus miwah mandeg tigang kelentungan maka cihna sinalih tunggil warga Banjar nganten.

Pawos 21.

1. Kulkul Desa utawi Banjar tan wenang ketepak yening tan sangkaning pituduh prajuru/Dulun Desa, sajawaning tengeran kepanca bayan.
2. Sang nepak kulkul tan sangkaning pituduh Prajuru/Dulu, patut digelis atur supeksa maka buatan panepake, yan tan mangkana sang mamurug kadanda manut pararem.
3. Kulkul sekeha-sekeha lan kulkul pondokan-pondokan tan kalugra nyawerin/matehin sukat utawi tengeran kulkul Desa utawi Banjar, prade mamurug taler kadendain manut pararem.

Palet 5.

Indik Druwen Desa

Pawos 22.

Padruen Desa Adat Tingkadbatu sekadi ring sor :

1. Kahyangan Desa luire :
 - a. Pura Kahyangan Tiga : Pura Penataran, Pura Puseh/Bale Agung, Pura Dalem Gede, Dalem Mrajapati lan Pura Dalem Pingit.
 - b. Pura Masceti.
2. Tanah Kering :
 - a. Tanah pelaba Pura Dalem 8,80 ha.
 - b. Tanah pelaba Pura Puseh/Penataran 1 ha.
 - c. Tanah Karang Kerti/A Y D S 41 AYDS
 - d. Pamuponlaba inucap patut kaanggen ngupahayu ring Kahyangan Tiga.
 - e. Tanah Desa Dalem kaselang dados ayah kerti 1 AYDS.
3. Tanah Sawah :
 - a. Tanah pelaba Pura Dalem 1 ha.
 - b. Tanah pelaba Pura Puseh 70 are.
4. Setra - setra / Tunon.
5. Lelanguan mekadi tetabuhan lan ilen-ilen padruwen banjar.
 1. Gong : 1 barung
 2. Gender : 2 wadah
 3. Klentangan : barung
 4. Ilen - ilen : Rejang, Pendet
 5. Barong Ket 1 (siki)
 6. Rangda 2 (dua)

Pawos 23.

Kawigunan tanah Banjar Adat lianan ring kawangunin Kahyangan, patut kautsahayang kapuponin.

Kawigunan Karang Kerti sane katanggap olih Krama suwang - suwang patut taler kautsahayang.

Pawos 24.

Piolih-olihan Desa Adat Tingkadbatu, luire :

1. Piolih-olihan saking pelaba pura
2. Urunan Krama Desa Adat
3. Paica saking Guru Wisesa
4. Paica-paica sane tiosan, sane patut

Pawos 25.

1. Prajuru Dulun Desa wenang ngetangan pamupon laba Pura lan sapanunggalan druwe Desa.
2. Pikolih lan pamuponnya kaanggen prabeya piodalan saha wewangunan ring Pura.
3. Nyabran pasangkepan Desa, Dulu Adat pengemong druwe ngawentenang atur indik munjuk lungsuring pradue ring Krama Desa.
4. Sakaluiring druwen Desa Adat patut wenten ilikitannya.
5. Tan kalugra ngadol utawi ngesahang padruen Desa yan tan kasungkemin antuk Krama Desa, sejawaning padruwe - padruwe Desa manut lokika dresta.

Palet 6.

Sukerta Pamitegep

Kaping 1

Karang, Tegalan Lan Carik

1. Krama Desa Pangemong karang Desa patut ngewatesin karang inucap antuk pagehan turus/tembok mangda pakantenannya asri.
2. Sasukatan Karang Desa sane katanggap suang-suang Krama Banjar manut dresta.
3. Wates sisi kaler miwah kangin patut kakaryanin antuk sang ngemong karang ayahan inucap sane mawasta magaleng keluan, sajawaning tanah pecatu, tegal, carik padruwean ngraga, sane kapiara batase sisi kelod miwah kauh reh punika mawasta gegaleng kateben.
4. Prade karasayang pagehan/turus inucap ngelikadin, yan prade arsa penyandinge kengin batese nganggen pinget kewanter saksi antuk Prajuru/Dulun Desa utawi prahcihna pal saking Agraria.
5. Prade wenten karang kebengbeng mangda kautsahayang wenten pamarginnya.

Pawos 26.

1. Sinalih tunggil Krama Desa/Banjar tan kalugra :
 - a. Ngalah-alah margi, tegal ayahan Desa, Karang Desa lsp.
 - b. Ngalah-alah tanah, tegal Kahyangan, setra lan sekancan tegak sinanggeh suci.

Kaping 2
Pengayoman
Pawon 27.

1. Ngawit nandur pepayonan tanem tuwuh patut adepa Agung nga-
jerang saking baten, prade jantos ngeliwat bates wenang
kesepat gantungin.
2. Yening wenten tetanduran ngungkulin, semalihe mewastu mayanin
kapisaga patut kawara antuk paiguman ping ajeng praside sang
nruwenang wit, ngerabah utawi notor.
3. Prade sampun kewara taler tan wenten usaha sang nruwenang
wit, sang rumasa katetehan/kajerihang wenang masadok ring
prajuru/Dulu tur risampun keparitatan keluarga / kalugra
ngicalang wit inucap, sakewanten patin pepayonan patut ke-
tawur manut pangelokika sane nepasin.
4. Sang keni pamidanda penyangaskara saha prabea manut pararem
arep ring wewangunan sang kerubuhan, luire :
 - a. Sang nruwenang wit sinanggeh mayanin, prade pungkut
ngerubuhin wewangunan krama tios.
 - b. Sang notor, munggul utawi ngerebah taru tur ngerubuhin
Krama tios.
5. Krama Desa patut ngemanggehang kawerdian tanem tuuh sane
ngawinan Desane asri tur lestari. (Lingkungan Hidup).

Kaping 3.
W e w a n g u n a n
Pawos 28.

1. Nyabran ngewangun patut :
 - a. Mesadok ring Prajuru/Dulu, ping ajeng prade wewangunan
ngeninin batas-batas.
 - b. Ngangge Asta Bhumi miwah gegulak Asta Kosala-Kosali,
sanistane manutin patitis niskala.
 - c. Tan nyanyubih Kapisaga.
2. Prade wewangunan jantos nyayubin, bilih-bilih temboke ring
telengin batas, risampun kewara tur kesadokang ring dulu ,
wenang kedanda manut pararem saha tembok inucap kegubar
utawi sanistanne mangda kekaryanang abangan.

Kaping 4.
W e w a l u n g a n
Pawos 29.

1. Sahanan warga Desa sane mamiara wewalungan (bawi risampun
belas, utawi banteng risampun masaluk tali), patut sayaga
nitenin negul/ngelogor mangda tan ngerisakin karang utawi
paabianan krama siqs, bilih-bilih jantos ngeranjing ngeletehin
kahyangan.

2. Prade wenten wewalungan melumbar utawi ngeleb ngerusakin pekarangan /paabyanan krama seos, risampun kawara kengin ketaban tur kedanda ngewalian wit sane karusak saha naur panebas panebas papiaraan tetabanan, anut pangelokikan prajuru/Dulun Desa.
3. Prade jantos ngeletehin tegak suci minakadi pamerajan (sanggah Kemulan), risampun kaparitas antuk Prajuru/Dulu wenang sang nruwenang kadanda mabuhu agung tebasan Prayascita, dur Manggala utawi Panca Sata iwak bebek belang kalung, prade jantos ngeletehin Kahyangan Tiga utawi Pura Pamaksan.
4. Krama Desa patut nyanggra wewalungan miwah prani, tan kpatut ngemademang paksi miwah sane siosan.

Kaping 5.

B h a y a

Pawos 30.

1. Pari indik bhaya luire : Jiwa bhaya, Artha bhaya, (kapandung) dura cara ring Agama.
2. Sang manggihin kehanan Jiwa Bhaya, patut nepak kulkul bulus mapitulung anut pawos 16 (2) aksara b.
3. Prade ring Desa kehana Jiwa Bhaya, patut Desane ngaturang butha Yadnya tur sang mayaning katur ring sang ngawewenang.
4. Prade wenten jatma mamisuh utawi nguman-uman jatma tios, keni pamidanda bea pecamil tebusan prayascita.

Pawos 31.

1. Sang manggihin sahanan Artha Bhaya (kemalingan), patut ngulkul mapitulung anut ring pawos 16 (2) aksara b, utawi sang kemalingan atur supeksa ring prajuru/Dulun Desa sane pacang nimbangin utawi nandanin anut daging KUHP, saha mawuwuh panyangaskara prade wenten jatma ngemaling barang sinanggeh suci.
2. Pratingkahe mailon ring dusta kabawos saruron, prade wenten jatma manggihin maling tan nyadokang ring prajuru / Dulu jantos jatma tios nyaduang patut kadanda kadi nandaning maling, saakweh panga rgan manut cacakan banjar, tur prade jantos ping tiga melaksana asapunika wenang kasukserahang ring ngawe wenang.
3. Prade wenten jatma ngerereh reramon minakadi don kelapa, ron, tan sadok ring sang nruwenang wit, prade kacunduk (ketara) patut kadanda kadi nandaning maling.
4. Yening wenten jatma ngeranjingin pakubon wiadin pekarangan rikala suung, mawastu sang madruwe karang keicalan, wenang jatma inucap ketuwekang antuk madewa saksi ring pura Bale Agung.

5. Mangda tan katuwekang manut ring ajeng, asing-asing nge -
rànjingin pakubon jatma tios patut :
- a. Matengeran suara (makaukan).
 - b. Nyantos sang nruweang karang rawuh utawi masadok ring pengapit pinih tampek/paek maka buatan pengeranjinge.
 - c. Pemedal karang kedagingin sawen, makecihna pengarah rikala suung.

Kaping 6.

Penyanggran Banjar

Pawos 32.

Krama Desa rikala ngawentenang karya suka-duka patut kasanggara antuk banjar luire :

- a. Prade ngewangun Pitra Yadnya utawi manusa Yadnya, manut pinunas sang meyadnya.
- b. Pengerombo utawi karya gotong royong krama, jantos ping tiga selangkung punika patut katuran pangu.
- c. Pengu rikala Pitra Yadnya anut abot dangan Yadnya prade saking semongan ngantos wengi katuran pangu ping kalih.

Kaping 7.

Pari Werti (Kelestarian Lingkungan)

1. Sahanan Warga Desa Adat tan kpatutang majejemuhan, ngutang Mis, Mabacin, Masiram ring margi Agung, sane prasida ngi - calang kasukertan Desa Pakraman.
2. Telajakan Karang sane majeng, Mrajan, karang sukat satak, patut kapiara nyabran rahina, tur katandurin sarwa Sari.
3. Sahanan Warga Desa Adat patut mabersih-bersih nyabran rahina ring karang Paumahan sami sakeng telajakan ring unkur , Pekarangan sukat satak, Merajan, telajakan ring Ageng , rauhing Got lan Margi Agung.
4. Sang sapa sira ugi murug kasukertan inucap, patut keni danda 50 (seket) kepeng jinah bolong.

SARGAH IV.

Sukerta Tata Agama

Palet 1

Indik Dewa Yadnya

Pawos 33.

1. Palinggih penyiwan sawidangan Desa Adat Tingkadbatu, luire :
 - a. Kahyangan Tiga : Pura Penataran, Pura Puseh, Pura Dalem.
 - b. Pura Dalem Pingit, Pura Mraja Pati.
 - c. Pura Masceti.

2. Rahinan piodalan soang-soang Pura inucap kadi ring sor :
 - a. Pura Penataran, Pura Puseh rikala Anggarkasih Wuku Medangsa.
 - b. Pura Dalem, Pura Mrajapati : rikala Buda Wage Wuku Langkir.
 - c. Pura Dalem Pingit : rikala Buda Wage Wuku Langkir.
 - d. Pura Masceti : rikala Weraspati Umanis Wuku Medangsa.
3. Pangaci ring Pura inucap manut kecap sastra Agama, saha kelaksanayang : Nista, madya, utama manut kawentenan lan pararem.
4. Pangempon soang-soang Pura manut dresta kadi ring sor :
 - Pura Penataran antuk Krama Ayah Karang Marep.
 - Pura Puseh kaempon antuk Krama Ayah Karang Marep.
 - Pura Dalem kaempon antuk Krama Ayah Karang Marep.
 - Pura Mrajapati kaempon antuk Krama Ayah Karang Marep miwah Bala Angkep.
 - Pura Masceti kaempon antuk Krama Subak.

Pawos 34.

1. Ring soang-soang Pura inucap kawentenang Pamangku.
2. Ngadegang Pamangku nganut dudonan :
 - a. Nyanjaan utawi masemburang, soang-soang mapiteges mapinunas ring ajeng Natar Pura utawi kapradesa manawi ring Balian Konteng, lan sapanunggilannya, antuk pamargi ping tiga (3).
 - b. Turunan utawi ngwaris.
3. Tan kawenang anggen Pamangku, luire :
 - a. Ceda-angga, luire : peceng, perot, cungh, punyah-punyah-an lan sapanunggilan ipun.
 - b. Sang sapesira ugi sane tan kapatutang anut pararem.
 - c. Sakit ila, ayan, buduh.
 - d. Sane madrebe kasucian urip tan becik.
4. Prabea kapemangkuan :
 - a. Adiksa Widhi, kamedalin saha kalesanayang antuk sang ngadegang, mekadi Krama Desa utawi Pangempon Pura soang-soang.
 - b. Mapitra Yadnya riwekas, prade Pamangku lanang - istri seda, sanistan nyane : Nyawa Geni/Brahma Frayascita, utawi nganut pararem prade seraya kalaksanayang antuk warga sire Mangku.
5. Pamangku patut ngamanggehang susananing Pamangku, luire tan wenang ajajuden, utawi manut Gagelaran Pamangku.

Pawos 35.

- a. Ngenterang Upacara Piodalan ring Kahyangan utawi ring soang-soang Pakuubin Krama.

- b. Tan wenang salah-suluh, yan mamurug wenang mangku inucap nyapuhin raga /mawinten.
- c. Prade salah sinunggil Pamangku kapialang utawi Cuntaka, kengin nyelahang mangku Kahyangan tiosan utawi nuur Sulinggih.
- d. Samaliha yan sampun Pamangku ngayah tigang rahina ring Pura, wenten Kula wargania seda, mangku inucap tan keneng cuntaka, sakewanten mangku tan budal selamin piodalan.

Pawos 36.

Petias utawi olih-olihan Pamangku luire :

- a. Penyolasan miwah sesarin canang soang-soang pangempon Krama Desa.
- b. Upon palaba carik miwah Tegal manut pararem.
- c. Luput pakaryan lan rerampen/reramon, indik pidaging keni manut kadi patut.

Pawos 37.

1. Pamangku kagentosin riantukan :

- a. Seda.
- b. Pinunas ngeraga manawi kageringan lan sapenunggalanya.
- c. Kawusang antuk Krama, manawi malaksana asta dusta, keni pamidanda manut pararem saha ngewaliang prabeya pawintenan pecak.

Pawos 38.

Kasukertan Kahyangan kadi ring sor :

a. Tan kalugra ngeranjing ka Pura luire :

- 1. Sang katiban cuntaka, makadi sebel sakeng ngeraga ;
 - a. Sebel Kandel Ngeraja Swala, salami dereng mabersih.
 - b. Sebel wawu madruwe Putra selami 42 rahina (sane istri)
 - c. Sebel pangantenan, selami dereng mabyakala.
 - d. Cuntaka sakeng wenten Krama seda manut sengker.
 - e. Sebel riantuk madruwe kulawarga padem/kalayu sekaran ngantos masapuh.
 - f. Sebel mobot nenten wenten ngangkenin selami dereng sah.
- 2. Makta sahanan barang ngaletihin.
- 3. Sato agung, sajawaning rikala mapepada utawi pamargin jagi Yadnya.
- 4. Mabusana tan manut kadi tata caraning ngeranjing ka Pura.
- 5. Sadereng polih uak-uakan (pituduh) Prajuru pituduh Dulun Desa.

b. Pratingkahe tan wenang ring Pura :

- a. Masumpah (Cor), sajawaning pituduh prajuru/Dulun Desa.
- b. Makobetan, masasenengan, makolem dados asiki lanang-wadon, mawihara nyangsang busana, makoratan (lianan ring rare /alit-alit), menahin pusung (saantukan punika

- rikala majejahitan patut magelungan busung macingor lidinya), manyusuin anak alit / rare.
- c. Mungga tedun ring palinggih suci, sajawaning pituduh prajuru Dulu.
 - d. Ngawentenang ajuden : minakadi, ceki, ceclok, domino, miwah bakananipun ring karang Suci Palemahan Pura.
 - e. Sang sapa uira ugi mamurug kecaping ring ajeng, keni pamidanda Pamerascita Pura sapatutnya.

Pawos 39.

1. Yan wenten jasma kerawuhan ring Pura, kengin kapintonin prade rumasa kasumbang saya, yan tan wiakti jatma inucap kasisipang manut pararem.
2. Prade Kahyangan kehanan durmanggala, minakadi kapancabaya, Pamangku patut digelis nyadokang Dulu Adat mangda marumang Krama Desa tur ngawentenang pamerayascita sepatut nyane.

Palet 2.

Indik Resi Yadnya.

1. Sang pacang madeg Pandita utawi Pinandita minakadi Balian Sonteng, Kubayan, Dalang, saha luiring jagi ngenterang Yadnya patut masadok ring Prajuru Desa Adat kalih Parisadha Hindu Dharma/Lembaga Adat.
2. Prajuru Desa patut ngawas nitenin tur naweng ngalangin prade wenten Kacihnan sasar kakecap miwah drestane, tur sareng nyaksinin Upacara saha nyiarang ring paruman Desa tegap rauhing wates kewenangan panganter Yadnya.
3. Krama Desa patut ngaturang ayah sapengadeg miwah pengelepas Sang Sulinggih riwekas katuntun antuk prajuru/Dulu-Dulu.

Pawos 40.

1. Sang Sulinggih patut ngeriyinang ngayunin ring wawidangan jagat malinggih/jumenek, sasampun wawu muputang Yadnya kajebag tios jagat utawi ka Dura Desa.
2. Krama Desa sami patut sareng ngawas nitenin katuntun antuk Prajuru/Dulu-Dulu, mangda sahanan Yadnya nenten sakewenang kaicen pamuput olih Pedanda utawi Pinandita manut kawenanganya soang-soang.

Palet 3.

Indik Pitra Yadnya.

Pawos 41.

Pamargin Pitra Yadnya madudonan manut sakadi ring sor :

a. Pangupakaran Sang Kalayu Sekar

1. Antuk mendem utawi ngeseng, makecihna makingan ring ibu pertiwi utawi ring Batara Brahma, selami

nuptupan prabeya.

2. Atiwa-tiwa/upakara Pangabenan/Palebon.

- b. Upacara Upakara Pitra Yadnya riwusan ka abenang mawasta munggah daun bingin/ngeroras, wawu kalaksanayang Ngaling-gihang Dewa Hyang/Batara-Batari.

Pawos 42.

Swadharmaning lan tategenan prade wenten sinalih tunggil Krama Kalayu Sekar/seda :

a. Sang kaduhkitan patut :

1. Nyadokang ring Kelian tur nunas tatimbangan ring kawentenanya.
2. Ngaturin Banjar Ngrombo mekarya eteh-eteh sarwa kadulurin panyembrama canang sesida antuk, utawi maweweh pangromba nganter kasetra.

b. Swadharmaning Banjar/Desa :

1. Kelian Banjar maritatas pemargin sang kaduhkitan, napike kapendem, makingsan riin utawi lantur Kaa-benang.
2. Prade kapendem, raris kawentenang Kulkul petahu antuk pawos 16 (3) aksara b, antuk Kelian Banjar utawi Wakilnya.
3. Penyanggran Banjar salanturnya :
 - a. Soang-soang Krama Banjar Nedunin Patus Beras sami Alumbur, jinah sami manut pararem.
 - b. Ngerombo ngaryanang eteh-eteh sawa, saha kasa-rengin antuk Krama sane rawuh maaksian/madlokkan.
 - c. Sami Krama Banjar nganter kasetra jantos papendem puput.
 - d. Tan kengin ngelelet/nyekeh sawa langkungan ring 7 (pitung) rahina, tur patut polih pagebagan anut paitungan Kelian Patus/Banjar.
 - e. Tan kalugra nginepang Bangbang ring Setra.
 - f. Prade wenten Kalayu Sekar rikala piodalan, kengin mendem tanpa sadok tur mamargi tengah wengi utawi mendem Kasetra siosan.

Pawos 43.

1. Sane kasinanggeh Kacuntakan sakadi ring sor :

- a. Cuntaka antuk kalayu sekaran.
- b. Cuntaka antuk Ngeraja sewala.
- c. Cuntaka antuk ngembasan Putra.
- d. Cuntaka antuk Karuron.
- e. Cuntaka antuk Sakit Ila/Buduh.
- f.

- f. Cuntaka antuk Pawiwahan.
 - g. Cuntaka antuk Gamia Gamana.
 - h. Cuntaka antuk salah timpal.
 - i. Cuntaka antuk yening wenten anak istri mobot nenten Kaupakarayang pabyukawonan tur pawidhi widanan.
 - j. Cuntaka antuk mamitra ngalang.
 - k. Cuntaka antuk yening wenten anak istri ngawentenang Putra sadurunge maupakara pabiukawon tur pawidhi widanan.
 - l. Cuntaka antuk Sad Tatayi.
2. Sengker Cuntaka manut kawentenanya :
- a. Cuntaka Kalayu Sekaran : ring Krama Adat 3 rahina, pangarep, pangapit Karang 11 rahina.
 - b. Cuntaka ngeraja Sewala : 3 rahina/selami ngeraja sewala.
 - c. Cuntaka ngembasang Putra 42 rahina mantuk ring Sang Istri akepus puser mantuk ring Sang Lanang (kapracih-nayang antuk Upakara tutug kambuhan).
 - d. Cuntaka Karuron : 42 rahina tur kapuputan antuk matirta Pemerascita.
 - e. Cuntaka Pawiwahan, ngantos matirta Pabiya Kawonan.
 - f. Cuntaka Gamia Gamana : selami durung kapalasang tur kadulurin antuk Upakara Pemerascita raga lan Desa Adat/Kahyangan.
 - g. Cuntaka salah timpal ; kapuputang sekadi Agama Hindu tur Dresta ring Adat.
 - h. Cuntaka anak istri mobot nenten kawentenan upakara Pabiukawonan cuntakanya ngantos kaupakara Pabiukawonan.
 - i. Cuntaka Mamitra Ngalang, selami dereng kawentenang Upakara Pabiukawonan.
 - j. Cuntaka Ngembasan Putra nenten Kabiukawonang miwah Upakara Widhi Widana : cuntakanya selami dereng kawidhi widana lan kaperas.
 - k. Cuntaka Sad Tatayi, cuntakā ngatos sampun maprayascita Jagat, tur nenten pisan dados ngamunggahang Upakara Padwijatian.
3. Cuntaka Kelayu Sekaran/Kepademan :
- a. Kepademan cuntakania :
 - Cuntaka/sebel Banjar : 3 rahina riwusan mendem utawi sasampun polih Prayascita Masapuh.
 - Cuntaka Kulawargania : 11 rahina
 - b. Kaaben cuntakania :
 - Sang nyambut Karya Pitra Yadnya cuntakania roras rahina, utawi rawuh riwusan Yadnyania/mapegat.
4. Sane katiban cuntaka luire :

- a. Kalayu Sekaran sane kacuntakan :
 - Sang sane Kalayu Sekaran.
 - Kaula wargania.
 - Babanjaran.
 - b. Ngeraja Sewala sane kacuntakan :
 - Sang sane ngeraja sewala.
 - c. Ngembas Putra sane kacuntakan :
 - Kula wargania sane ngembasan Putra lanang wiadin istri.
 - d. Pawiwahan sane kacuntakan :
 - Sang sane kaupakara Pawiwahan Lanang-Istri.
 - e. Karuron sane kacuntakan :
 - Kula wargania Lanang-Istri.
 - f. Gamia Gumana sane kacuntakan :
 - Sane ngelaksanayang Gamia Gumana.
 - Desa Adat nyane.
 - g. Anak Istri mobot nenten kawentenan Upakara pabiukawonan sane kacuntakan :
 - Sang sane maraga Istri (sane mobot).
 - h. Ngembas Putra nenten kawentenan Upakara Pabiukawonan miwah Upakara Pawidhi Widanan sane kacuntakan :
 - Sang sane ngembas Putra.
 - Putra sane embas.
5. Tan keneng cuntaka luire :
1. Sang Sulinggih lan Pemangku Kahyangan Tiga.
 2. Rikala Piodalan risampun ngalang Sasih/ngalang tengah.
1. Atiwa-tiwa/Pengabenan kelaksanayang antuk :
- a. Nyawa Resi, Nyuasta Geni (santukan tan ngagah utawi sawa tan kakeniang).
 - b. Sawa Prateka.
2. Panemayan ngabenang wenten kalih pawos :
- a. Ngaben Dadakan/bah bangun, kadadosang sajeroning 3 - 7 rahina.
 - b. Ngaben ngemasa sejeroning Tempekan/rombongan.
3. Dudonan Pangabenan kawit sakeng ngayah (seda), ngeseng jantos pangiriman utawi nganyut.

Pawos 44.

Keputusan Pangabenan wenten kalih pawos :

- a. Ngaben ngemasa luire : keni beras : Abungbung, Ayam keni : aukud kembul dua, kelapa sami abungkul, gesing manut kawigunan.
 - b. Ngaben dadakan pateh keni kadi ring ajeng.
 - c. Ngurug keni beras : Alumbur, jinah Rp. 100,-
- Pangingune ring Krama Banjar ngawit ngayah anut abot dangan karyane.

Palet 4.

Indik Manusa Yadnya.

Pawos 45.

1. Manusa Yadnya inggih punika Upacara-Upakara Dharmaning Manusa ngawit sakeng patemoning Kama Bang sajeroning Garbha ngantos kalayu Sekar riwekas.
2. Upacara kadi ajeng madudonan sakadi ring sor :
 - a. Magedong-gedongan duk pengerompinian ibiang.
 - b. Duk sang kama reka medal/embas raro.
 - c. Kepus odel.
 - d. Roras rahina.
 - e. Tutug kambuhan/42 rahina.
 - f. Tigang sasih/3 bulan.
 - g. Pawetuan/Oton 6 sasih.
 - h. Tutug kelih/ngeraja Wedana, Ngeraja Sawala.
 - i. Metatah/mapandes.
 - j. Mawiwaha.
 - k. Mawinten/mapodgala.
3. Upacara-Upacara inucap kamargiang : Nista, Madia, Utama. Manut sastra Agama saha Catur Dresta, maka buatan desa Dresta, ngawinang sima cara Desa.

Palet 5.

Indik Bhuta Yadnya.

Pawos 46.

1. Bhuta Yadnya inggih punika Upacara-Upacara biakala ring Pertiwi lan Kahyangan, Sarwa Prani saha Upacara-Upacara ring Kabhutan.
2. Upacara pabiakala ring sarwa Prani luire :
 - a. ring Sarwa Tumuwuh rikala Tumpek Wariga (Saniscara Keliwon Wuku Wariga).
 - b. ring sarwa ingon-ingon rikala Tumpek Kandang (Saniscara Keliwon Uye).
3. Upacara Pabiakala ring Pertiwi, Kahyangan lan Babhutan kawastaning Macaru.
4. Pecaruan inucaping ajeng nista, madia, utama manut wigunan kadi ring sor :

a. Eka Sata	d. Resi Gana
b. Panca Sata	e. Tawur Agung
c. Panca Sanak	f. Panca Kelud.
5. Sajawaning kadi ajeng kawentenang Upakara :
 - a. Majot-jotan utawi Yadnya sesa nyaberan wusan ngeratengan.
 - b. Mesapuh-sapuh rikala pacang Wali ring Pura.

Pawos 47.

1. Ngangkén ngewarsa rikalaning Tilem Kasanga kawentenang Tawur Kesanga, ketah kabawos ngerupuk, macihna pacang mapag rahina Panyepian benjangne.
2. Upacara Panyepian sane kemargiang antuk Krama Desa :
 - a. Amati Geni, tan kengin maapi-api.
 - b. Amati Karya, tan kengin Nyambut Karya.
 - c. Amati Lelanguan, tan kengin maoneng-onengan, masuara gore, lan sapanunggalanya.
 - d. Amati Lelungan, tan melelungaan.
3. Paberatan inucap kemargiang sakeng semeng ngantos benjangne endag Surya.
4. Sang amurug kecaping ajeng keni pamidanda manut pararem Banjar.
5. Ring ngupadi kasutrepian ring ajeng patut kamargiang patelik Pecalang.
6. Riwus rahina Nyepi/benjangne maka cihna pengawit Icaka Warsa, patut soang-soang warga Desa sami ngaksama/Dharma Shanti.

SARGAH V

Sukerta Tata Pawongan

Palet 1

Indik Pawiwahan

Pawos 48.

1. Pawiwahan inggih punika patemon purusa pradana, melarapan penunggalan kayun suka cita kaduluring upasaksi sekala niskal.
2. Pelaksanaan pawiwahan luire :
 - a. Pepadikan, kemanggala antuk pekraman.
 - b. Ngerorod, merangkat riya wawu kakrunayang.
 - c. Nyeburin utawi sentana nyeburin (risampun nganutin pemerasan).
3. Pidabdab sang pacang mawiwaha patut :
 - a. Sampun manggeh dahe - teruna (prasida nganutin undang-undang).
 - b. Sangkaning pada rena (tan kepaksa).
 - c. Manut kecaping Agama (tan gamia gemana).
 - d. Kawisudayang prade pengambile tios Agama miwah kapati wangi.
4. Pemargin pawiwahan mangda taler nganutin undang - undang perkawinan saking sang Ngawiwenang.

Pawos 49.

1. Pawiwahan sane kepatutang ring Desa, sekadi ring sor :
 - a. Sampun kemargiang pabeyakala utawi pesakepan, kesinaksang sekala niskala antuk Pandita pinandita.
 - b.

- b. Wenten pesaksi Prajuru utawi Dulu, Dulu sane mapeke -
lingang utawi ngilikitayang pawiwahan.
 - c. Sampun matengeran suaran kulkul.
 - d. Pawiwahan inucap ring ajeng sampun kecatatang ring
Kantor Camat utawi Kantor Catatan Sipil Kabupaten Daerah
Tingkat II Bangli.
2. Perabian sane tan manut kadi ajeng sinanggeh tan patut
(tan sah).

Pawos 50.

Tata caraning Perabian patut sekadi ring sor :

- a. Sapa sira ugi pacang ngewarangan pakulawargan patut masadok
ring Prajuru/Dulu-dulu, selanturnya Prajuru maritatas manut
tan manut kakecap perabiane.
- b. Pemargin pepadikan anut dudonan :
 1. Pekrunan jantos ping tiga, saha soang-soang melarapan :
 - a. Kepertama antuk canang.
 - b. Kaping kalih antuk canang ring sajeng.
 - c. Kaping tiga antuk tipat bantal, kebawos pemuput
pepadikan.
 2. Risampun mapragat raris sang istri keajak budal ring
pakubon sang lanang, saha kelanturang antuk pabeyakala.
 3. Mangda pragat tumus sekala niskala, raris kulawarga
purusa makta pejati ring merajan wadone.
- c. Prade ngrorod/merangkat patut :
 1. Reraman lanange ngawentenang pamilaku utawi pejati
antuk duta sakirangnya 2 diri.
 2. Pagebahan antena tan kengin ring pakubon sang lanang
mabeya kala.
- d. Sajeroning pakurenan/pangelakuan patut :
 1. Kamanggala antuk geng pengampura arep ring reraman
Wadone.
 2. Kaiguman bawos indik pakidih utawi palegayan arep ring
pasewakan sang ngidih saha dewasa pakerabkambeyane
riwekas.
 3. Kacihnayang indik kapurusa utawi prade sentana rajeg
kejejerang kepatut ngidih anak lanang sane kabawos
pawiwahan nyeburin, tur risampun sulur pamerasan ka-
tegepin kemanggehang sentana nyeburin.
 4. Prade tan terima pejati, pakrunan kemargiang jantos
ping tiga.
- e. Pakerab-kambeyan mapiteges upacara tinas apdang (puput)
mapekurenan dwaning manut sekadi ring sor :
 1. Sajeroning kabawos ambe, kelaksanayang ring sekala
antuk sarana jejauman miwah pawidhi widanan :

- a). Jejauman pinaka ngambe /ngadungan kayun soang -
soang pakula wargan wadone.
 - b). Widhi widana pinaka pejati niskala nunas wadone
ring pamerajan kamulanya.
2. Sajeroning bawos kerab polaksana ring sekala :
- a). Antuk penyaksi Krama Banjar, dwaning kekerabian
antuk tengeran kulkul.
 - b). Pamekas penyaksi Prajuru/Dulu-dulu saha ngilikita-
yang.

Palet 2

Indik Nyapian

Pawos 51

1. Pawiwahan prasida kawisang malarapan antuk palas marabian
utawi kepadaman.
2. Wusan mapikurenan riantukan salah sinunggil seda mapiteges
balu makadi balu lanang/istri.
3. Palas marabian wenten kalih pawos, inggihpunika, sangkaning
pada lila miwah mawiwit wicara.
4. Sang ayat marabian patut atur supeksa pailikitan riin ring
sang rumawos (Pengadilan Negeri) wastu tinas apadang
panutuse kabawos nyapian, wawu Dulu nyiarang kawentenannya
ring Desa saha keni pamelin kulkul manut pararem.

Pawos 52

Tata cara palas perabian sangkaning pada lila sekadi ring sor :

1. Nawur prabeya pesaksi sinalih tunggil sami atenga.
2. Pagunakayan polih pahan pada atenga.
3. Pebekel, tadtadan soang-soang kekuasa niri-niri miwah
warisan kekuasa antuk Purusa.
4. Mgeweruhin miwah ngupajiwa prati sentana manut swadarna-
ning guru Rupaka.
5. Nawur pamidanda panebas kulkul manut pararem.
6. Ngelung jinah lokika Prajuru/Dulu.

Pawos 53

Prade riwekas sang palas kecihnan adung malih patut :

- a. Ngelaksanayang pawiwahan malih.
- b. Kadenda nikel sakeng palase, yadiastun wit palase pecak
sangkaning pada lila.

Pawos 54

1. Sang balu kebinayang dados :
 - a. Balu luh wit sentana (sentana rajeg) miwah balu luh boya
sentana.
 - b.

- b. Balu muani kapurusa (wit sentana) miwah balu muani nyeburin (boya sentana).
2. Swadarmaning balu inucap patut :
- a. Nemannggehang pati brata tan kengin ngenangiang para dara.
 - b. Nguasayang waris pagunaknaya, tan dados ngadol, ngadeang, niskidihang, lan siosan sakeng kurenanya prade pianak kantung alit-alit.
 - c. Kengin ngidih sentana prade wenten pidabdab sadurung sinalih tunggil padem, sana kabebasan antuk kula warga singgih kapurusa.
 - d. Kawenangang mawiwaha malih, prade wenten kabebasan anut angka - angka ring ajeng.

Pawos 55

Balu kaucap tan pageh sakadi ring sor :

- a. Dratikrama utawi para dara.
- b. Manilar sakeng pakubon tan pasadok jantos 6 (nem sasih).
- c. Lepas saking swadarma sewos-sewosan, tan prasida ngesehin salah maprawerti arep ring petuduh ring kulawarga purusa.

Palet 3

Indik Sentana

Pawos 56

1. Sentana wenten kalih pawos, sane kaucap prati sentana miwah sentana paperasan.
2. Pratisentana inggih punika, sentana sane metu sakeng pawi - wahane kepatut.
3. Prade pawiwahane tan kepatut ngewetuang sentana, mangda tan kantung kawastanin bebinjat utawi astra yogia gemanggala antuk penyangaskaran.
4. Prade pawiwahane tan ngemetuang sentana kengin ngidih sentana antuk upasaksi sekala niskala sane kawastanin sentana paperasan.
5. Sentana rajeg inggih punika, pratisentana wadon (predana) sane kewannggehang lanang (purusa) tur risampun ngelaksana- yang pawiwahan nyeburin.
6. Sang sane dados kearsayang sentana rajeg inucap wiwit (5), inggih punika :
 - a. Pratisentana wadon tunggal.
 - b. Sampun nemannggehang dados pratisentana lanang (purusa).
 - c. Kapawiwahan keceburin, kautamayang antuk jadma sane maagama Hindu utawi jadma sane maagama siosan sane sampun ngelaksanayang pamarisuda raga utawi Sudhiwadani.
 - d.

- d. Sane manggehang sentana rajej patut mapasadok ring I Prajuru Banjar, tur ring I Klian Banjar patut nyiarang ring Banjar saha ngaturang ring prajuru Desa Adat.

Pawos 57

1. Ngangkat sentana manut dudonan patut makecihna arta brana pemerasan sane kesinaksiang sekala niskala.
2. Sapa sira ugi krama pacang ngidih sentana patut masadok ring Bendesa sanistana asasih sadereang pemerasan.
3. Bendesa kawakilin antuk Klian-Klian Banjar nyiarang ring sawawidangan Desa, sang sapa sira ugi rumasa tan lila mangda nyadokan masengker kalih wuku sabanen pamerasan ring Bendesa Adat.
4. Prajuru/Dulun Desa digelis mawosin saha ngicenin pemutus nepak ring catur dresta miwah pararem.
5. Prade sulur pemerasan tan manut ring kecaping ajeng, Dulun Desa wenang ngandeg sang pacang mekarya, saha ngicenin penuntun, mangda keputusan riya bebawos sulur utawi wicarane

Pawos 58

1. Peperasan sane kepatut ring Desa risampun makecihna :
 - a. Widhi-wedana pemerasan.
 - b. Kesaksinin antuk Dulun Desa sane makelingan utawi ngilikitayang.
 - c. Tur kesiarang ring wewidangan Desane.
2. Sane kepatut peras angge sentana kadi ring sor :
 - a. Jadma maagama Hindu.
 - b. Pepernahan maduang saking sang meras.
 - c. Kula warga saking purusa, prade tan wenten kengin saking wadon yening taler tan wenten wawu kengin sekamakama (saking kayun).
 - d. Kutamayang saking waris pancer kapurusa.
 - e. Sinalih tunggil mawiwit saking kulawarga tunggal sanggah utawi merajan, paibon lan Dadia utawi ngambilin anak tios sakewanten sang maagama Hindu.
3. Kengin ngangkat sentana langkung ring adiri, lanang wiadin wadon.

Palet 4

Indik Warisan

Pawos 59

1. Warisan inggih punika tetamian arta berana saha ayah - ayah ngupadi sukerta sekala niskala saking luluhurannia arep ring turunannya.
2. Kang sinanggah warisan luire :

- a. Due tengah, mekadi tegal ayahan desa, Kahyangan, pusaka siwa keranalap.
 - b. Pemerajan kemulan.
 - c. Peguna kayan, tadtadan/jiwa dana, utang piutang.
3. Wawu kengin kebawos warisan prade wenten :
- a. Sang mamiturun (pewaris).
 - b. Keturunan (ahli waris).
 - c. Arta berana miwah tatogenan (ayah-ayah) makecihna warisan.

Pawos 60

1. Ahkli waris luiire :
 - a. Pratisentana purusa.
 - b. Pratisentana predana (sentana rajeg).
 - c. Sentana peperasan lanang/wadon.
2. Prade tan wenten sekadi ajeng, kang sinanggeh ahkli waris :
 - a. Turunan purusa pernah ngunggahang, rerama lanang, pekak selantur ipun rerama misan mindon.
 - b. Turunan purusa pernah kesamping mekadi keponakan miwah mindon.

Pawos 61

- Swadharmaning ahkli waris patut :
- a. Nerima saha ngusahayang tetamian pahan saking leluhurnia mekadi ngerempoan sanggah, Pura saha pangupakarania, miwah nyeledihinin ayah-ayahan pewaris.
 - b. Ngabenan pewaris saha ngelanturang upacara-upacara Pitra.
 - c. Naurin utang-utang pewaris sane manut pengelokika.

Pawos 62

- Penepasan waris nganut sekadi ring sor :
- a. Risampun ngelaksanayang Pitra Yadnya lan utang - utang pewaris bintat katawur.
 - b. Para ahkli waris polih pahan pada sangkaning pegunakayan sejabaning karang/tegal ayahan desa keamong antuk ahkli waris kang sinanggeh Krama marep utawi Krama batan paha.
 - c. Sinalih tunggil ahkli waris kengin tan polih pahan prade :
 1. Nilar Kawitan lan sesananing Agama.
 2. Alpaka guru Rupaka.
 3. Sentana rajeg kesah mawiwaha utawi pratisentana nyeburin, soang-soang kabawos ninggal kedaton.
 - d. Boya ahkli waris kengin muponin hasil anut dudonan, luiire
 1. Sentana Luh, sedereng kesah mawiwaha utawi alpaka guru miwah prade madrebe pianak tan keangkenin antuk wong tua rare inucap, kengin ngewaris wantah pikolih (pagunakayan) sentana luh inucap kemawon.

2. Balu Luh wiadin muani nyeburin (soang-soang boya sentana).
3. Mulih deha utawi toruna, riantukan ring pawiwahane pecak sampun kebawos ninggal kedaton.
- e. Pewaris kengin maweweh rikala maurip pinaka jiwa dana, tadtadan/bekel maka cihna paweweh tetep ring pianak sane kesah mawiwaha.

Pawos 63

1. Prade wenten sejeroning pakula wargan wenten ahkli waris langkungan ring adiri patut :
 - a. Kawentenan paiguman indik pedum waris inucap.
 - b. Yan tan prasida katunasang tetimbang ring Dulu - Dulu (kerta desa).
 - c. Prade taler tan wenten cumpu ring penepas kerta desa kengin ketumusang ring sang rumawos (Pengadilan Negeri).
2. Prade karang inucap kaputungan, patut Prajuru/Dulu-Dulu nimbakang ring :
 - a. Sang sinanggeh ahkli waris manut pawos 61.
 - b. Sang kengin anggen sentana anut pawos 59 (2) miwah (3).
 - c. Prade taler tan wenten cumpu ring panebas kerta Desa kengin keputusan ring sang rumawos (Pengadilan Negeri).
3. Prade jantos karang desa kepah utawi kesapih, patut soang - soang nedunin mekrama Desa marep (batan paha).

SARGAH VI

Wicara Lan Pamidanda

Palet 1

Indik Wicara

Pawos 64

1. Sane wenang mawosin kadi pamutus wicara ring desa inggih punika Prajuru/Dulun Desa sinanggeh Kerta Desa.
2. Prade sang mawicara tan wenten cumpu ring pamutus Kerta Desa, kengin nunasan wicara inucap ring sang rumawos (Pengadilan Negeri).

Pawos 65

1. Sahanan wicara mawiwit kecorahan sakeluwire sinanggeh nungkasin daging awig-awig pasuara miwah pararem Desa / Banjar, Prajuru utawi Dulu patut digelis mawosin tan nyantos pesadok.
2. Sejabaning wicara kadi ajeng patut nyantosang pasadok sang nunas bawos.
3. Pamaspase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring catur Dresta.

Palet 2
Indik Pamidanda
Pawos 66

1. Desa/Banjar wenang niwakan pamidanda ring warga Desa sane sisip.
2. Peniwak inucap kelaksanayang olih Bendesa/Klian Banjar.
3. Bacakan pamidanda luire :
 - a. ayahan panukun kesisipan.
 - b. dandaarta (desa, danda saha panikel-panikelnya miwah panikel-panikel urunan).
 - c. rerampagan.
 - d. kedaut karang ayahnya.
 - e. kesepakang.
 - f. penyangaskara.
4. Pamidanda sane katiwakang patut masorsinggihi manut ring kesisipane.
5. Jinah utawi raja brana pamidanda ngranjing dados druwe Desa/Banjar.

Pawos 67

1. Krama sane langkung ring tigang paruman ngelantur tan nawur urunan miwah dadendan wenang kerampag.
2. Rerampagan ngangge tata cara kadi ring sor :
 - a. Kelaksanayang antuk Dulu kesarengin antuk Krama sekeha tigang diri maka saksi.
 - b. Sang ngerampag sangka darsana ngambil barang - barang utawi nyawenin tanem tuwuh, akehnya manut ring barang barang sane karampag.
 - c. Prajuru/Dulu miteketang mangda barang-barang sane karampag digelis katebus, masenger auku ring kutus rahina pacang kaadol.
 - d. Tan nganinin saluwir barang sane patut ingilang manut Agama miwah mademang pangupa jiwa sang kerampag.

Pawos 68

1. Prade sang pacang kerampag ngawara (ngalangi) pelaksana inucap mewastu sampun tan nganutin awig-awig Desa, wenang karang desa sane kagenahin kedaut antuk Desa.
2. Semalih yan purun taler ngalangi pelaksanaan kadi ajeng tan wenten pamargi sajawaning kasepekang antuk krama Desane.
3. Pamidanda inucaping ajeng keni buntas risampun sang kekani-nin :
 - a. Nunas geng pengampura ring Krama Desa riantukan nguak pasubaya (pararem pecak).
 - b.

- b. Naur pengangan penguak pasubayan duk pacang kerampag kadulurin perayascita penyaksak keiwangan ring Desa.

SARGAH VII

Nguwah-Nguwuhin Awig-Awig

Pawos 69

1. Nguwah nguwuhin Awig-Awig punika kelaksanayang antuk paruman Desa.
2. Awig-Awig puniki kamargiang ngawit keiguman (keraremin).

Pawos 70

1. Sakeluwirin sane nenten wenten saderengnya patut kaanutang ring sadaging Awig-Awig puniki.
2. Sakeluwiring sane durung kabawos sajeroning Awig-Awig puniki patut kelaksanayang manut tata cara sane sampun mamargi kadulurin antuk perarem-perarem.

SARGAH VIII

Pemuput

Pawos 71

1. Awig-Awig puniki keraremin duk rahina : Buda Wage Wuku Langkir, pangelong ping : 11, sasih Kepitu, tahun Icaka : 1913. Tanggal masehi : 1 Januari 1992.
2. Awig-Awig puniki kalingga tanganin antuk Bendesa/Kelian Adat saha Kesaksinin antuk Klian Banjar Dinas, miwah Manggala sakeng Guru Wisesa.
3. Luir sang ngelingga tanganin :

3. Lur sang ngelingga tanganin :

1. Kepala Desa Utama Prajuru :
Tingkatadbatu :
(I. WATAN NGIDEP)

2. Kelian Adat Pura Dalam

(I KETUT NERATA)

3. Kelian Adat Pura Puseh/
Penataran

(I NYOMAN DEGDEG)

4. Kelian Dinas Dusun/
Banjar Tingkatadbatu.
(KEG. TEMBUKU)
DESA WATAN PERTEN

5. Kepala Desa Jhem,

(SANG PUTU BANJAR)

NIK. : 7-1546/D

6. Camat Tembuku,

(DRS. IDA BAGUS NGURAH GEDE)

N I P. : 010077462

Mengetahui dan telah dicatatkan :
Bupati Kepala Daerah Tingkat II Bangli
TGL. 30-12-1991. REG. NO. 12. TH. 1991

(I. B. G. A. LADIP)

NIP. : 600002649